

BOSNA I HERCEGOVINA
Konkurencijsko vijeće



БОСНА И ХЕРЦЕГОВИНА
Конкуренијски савјет

R J E Š E N J E

**po Prijavi namjere koncentracije između privrednih subjekata
Alpla Holding GmbH, Austrija i Europet d.o.o., Bosna i Hercegovina**

**Sarajevo
Septembar, 2008. godine**



Broj: 01-03-26-019-10-II/08
Sarajevo, 11.09.2008. godine

Na osnovu člana 25. stav (1) pod e) člana 42. stav (1) pod d) u vezi s čl. 12., 14., 16. i 18. Zakona o konkurenciji («Službeni glasnik BiH», br. 48/05 i 76/07), po Prijavi namjere koncentracije između privrednog subjekta Alpla Holding GmbH, Alwin Lehner GmbH & Co.KG, Allmendstrasse 81, 6971 Hard, Austrija, zastupanog po advokatu Ivanu Tomiću, Dr. A. Starčevića 32c, 88 000 Mostar, Bosna i Hercegovina i privrednog subjekta Europet d.o.o. Čitluk, Bare br. 1, 88 260 Čitluk, Bosna i Hercegovina zaprimljenu pod brojem: 01-03-26-019-II/08 dana 28.05.2008.godine, Konkurencijsko vijeće, na 71. (sedamdesetprvoj) sjednici održanoj dana 11.09.2008. godine, je donijelo sljedeće

R J E Š E N J E

1. Ocjenjuje se dopuštenom koncentracija koja će nastati na tržištu proizvodnje ambalaže iz plastičnih masa u Bosni i Hercegovini sticanjem kontrole kupovinom većinskog udjela od strane privrednog subjekta Alpla Holding GmbH, Alwin Lehner GmbH & Co.KG, Allmendstrasse 81, 6971 Hard, Austrija u privrednom subjektu Europet d.o.o. Čitluk, Bare br. 1, 88 260 Čitluk, Bosna i Hercegovina.
2. Ovo Rješenje o koncentraciji upisuje se u Registar koncentracija.
3. Ovo Rješenje je konačno i bit će objavljeno u „Službenom glasniku BiH“, službenim glasilima entiteta i Brčko Distrikta Bosne i Hercegovine.

O b r a z l o ž e n j e

Konkurencijsko vijeće je dana 28.05.2008. godine zaprimilo Prijavu namjere koncentracije broj 01-03-26-019-II/08 (u daljem tekstu: Prijava) privrednog subjekta Alpla Holding GmbH, Alwin Lehner GmbH & Co.KG, Allmendstrasse 81, 6971 Hard, Austrija (u daljem tekstu: Alpla Holding ili Podnosilac prijave), zastupanog po advokatu Ivanu Tomiću, Dr. A. Starčevića 32c, 88 000 Mostar, Bosna i Hercegovina, po kojoj namjerava kupiti većinski udio u privrednom subjektu Europet d.o.o. Čitluk, Bare br. 1, 88 260 Čitluk, Bosna i Hercegovina (u daljem tekstu: Europet).

Uvidom u podnesenu Prijavu utvrđeno je da ista nije uredna i kompletna, u smislu člana 30 stav (1) Zakona o konkurenciji (u daljem tekstu: Zakon) i čl. 8. 9. i 10. Odluke o načinu podnošenja prijave i kriterijima za ocjenu koncentracija privrednih subjekata («Službeni glasnik BiH», broj 95/06) te je Konkurencijsko vijeće, u skladu s članom 31. istog Zakona, zatražilo dopunu dana 17.06.2008. godine dopisom broj 01-03-26-019-1-II/08, dana 09.07.2008. godine dopisom broj 01-03-26-019-3-II/08, dana 28.07.2008. godine dopisom broj 01-03-26-019-6-II/08.

Predmetna Prijava je dopunjena dana 04.07.2008. godine dopisom broj 01-03-26-019-2-II/08, dana 17.07.2008. godine dopisom broj 01-03-26-019-4-II/08, dana 24.07.2008. godine dopisom broj 01-03-26-019-5-II/08 i dana 08.08.2008. godine dopisom broj 01-03-26-019-7-II/08.

Konkurencijsko vijeće je dana 01.09.2008. godine dopisom broj 01-03-26-019-8-II/08 Podnosiocu prijave izdalo Potvrdu o prijemu uredne i kompletne Prijave (u daljem tekstu: Potvrda), u smislu člana 30. stav (3) Zakona.

Podnosilac prijave je naveo da nema obavezu podnijeti zahtjev za ocjenu koncentracije nekom drugom tijelu izvan teritorije Bosne i Hercegovine, u smislu člana 30. stav (2) Zakona.

Konkurencijsko vijeće u postupku ocjene dopuštenosti predmetne koncentracije je utvrdilo sljedeće činjenice:

Prijava namjere koncentracije je podnesena u zakonom propisanom roku, u smislu člana 16. stav (1) Zakona.

1. Učesnici predmetne koncentracije

Učesnici predmetne koncentracije su privredni subjekt Alpla Holding GmbH, Alwin Lehner GmbH & Co.KG, Allmendstrasse 81, 6971 Hard, Austrija i privredni subjekt Europet d.o.o. Čitluk, Bare br. 1, 88 260 Čitluk, Bosna i Hercegovina.

1.1. Privredni subjekt Alpla Holding

Privredni subjekt Alpla Holding GmbH, Alwin Lehner GmbH & Co.KG, Allmendstrasse 81, 6971 Hard, Austrija registrovan je dana 24.08.1996. godine u Registru firmi Republike Austrije.

Osnovna registrovana djelatnost privrednog subjekta Alpla Holding je upravljanje imovinom, a u okviru firme u holdingu proizvodnja ambalaža iz plastičnih masa.

Privredni subjekt Alpla Holding do sada nije bio prisutan na tržištu BiH pa tako ne posjeduje ni tržišni udio na istom.

1.2. Privredni subjekt Europet

Privredni subjekt Europet d.o.o. Čitluk, Bare br. 1, 88 260 Čitluk, Bosna i Hercegovina registrovan u Općinskom Sudu u Mostaru, u 100% je vlasništvu fizičkog lica Veselka (Dane) Pervan koji je ujedno i osnivač i jedini vlasnik privrednog subjekta.

Osnovna registrovana djelatnost privrednog subjekta Europet je proizvodnja ambalaže od plastičnih masa.

2. Obaveza prijave namjere koncentracije

Ukupan prihod privrednog subjekta Europet na dan 31.12.2007. godine iznosio je (..)*¹ KM. S obzirom da je ukupan prihod privrednog subjekta Alpla Holding na dan 31.12.2007. godine, ostvaren upravljanjem imovinom na svjetskom tržištu, iznosio (..)* KM, a njegov ukupan prihod, zajedno sa svim povezanim društvima koji su u sastavu holdinga, iznosio preko 100.000.000,00 KM po završnom računu u godini koja je prethodila koncentraciji, i da je privredni subjekt Europet registrovan na teritoriji Bosne i Hercegovine učesnici koncentracije su bili u obavezi podnijeti Prijavu u skladu s članom 14. stav (1) Zakona.

3. Pravni okvir ocjene koncentracije

Konkurencijsko vijeće je u provođenju postupka ocjene dopuštenosti predmetne koncentracije primjenilo odredbe Zakona, Odluke o utvrđivanju relevantnog tržišta («Službeni glasnik BiH», broj 18/06) te Odluke o načinu podnošenja prijave i kriterijima za ocjenu koncentracija privrednih subjekata.

4. Pravni osnov i oblik koncentracije

Pravni osnov koncentracije je Ugovor o istupanju i prijenosu osnivačkog kapitala, prava i obaveza (u daljem tekstu: Ugovor) zaključen 20.05.2008. godine u Čitluku između jedinog vlasnika privrednog subjekta Europet Veselka (Dane) Pervana i člana uprave privrednog subjekta Alpla Holding Georga Früha po kupoprodajnoj cijeni od (..)* KM ((..)*EUR).

Privredni subjekt Europet će nakon okončanja transakcije nastaviti poslovati pod imenom Alpla BiH. Predmetnim Ugovorom nisu ugovorena dodatna ulaganja pri čemu djelatnost ostaje ista.

¹(..)* - podaci predstavljaju poslovnu tajnu

Pravni oblik koncentracije podrazumijeva sticanje kontrole privrednog subjekata Alpla Holding nad privrednim subjektom Europet kupovinom većinskog udjela osnovnog kapitala u skladu s članom 12. Zakona stav (1) tačka b) pod 1.

5. Relevantno tržište

Relevantno tržište, u smislu člana 3. Zakona, te čl. 4., 5. i 6. Odluke o utvrđivanju relevantnog tržišta, čini tržište određenih proizvoda/usluga koje su predmet obavljanja djelatnosti na određenom geografskom tržištu.

Prema odredbi člana 4. Odluke o utvrđivanju relevantnog tržišta relevantno tržište proizvoda obuhvaća sve proizvode i/ili usluge za koje potrošači smatraju da su međusobno zamjenjive s obzirom na njihove bitne karakteristike, kvalitet, namjenu, cijenu ili način upotrebe.

Nadalje, prema članu 5. Odluke o utvrđivanju relevantnog tržišta relevantno tržište u geografskom smislu obuhvaća cijelu ili dio teritorije Bosne i Hercegovine, na kojoj tržišni konkurenti djeluju u prodaji i/ili kupovini relevantnog proizvoda pod jednakim ili dovoljno ujednačenim uslovima koji to tržište bitno razlikuju od uslova tržišne konkurencije na susjednim geografskim tržištima.

Relevantno tržište proizvoda predmetne koncentracije je tržište proizvodnje ambalaže iz plastičnih masa – PET ambalaže (ambalaže za pakiranje vode, sokova i drugih gaziranih i negaziranih pića, mlijeka i mliječnih prerađevina, deterdženata i drugih kemijskih proizvoda).

Relevantnim geografskim tržištem smatra se tržište Bosne i Hercegovine.

U tom smislu, relevantnim tržištem predmetne koncentracije smatra se tržište proizvodnje ambalaže iz plastičnih masa na cijeloj teritoriji Bosne i Hercegovine.

6. Analiza relevantnog tržišta

Privredni subjekt Europet svoje poslovne djelatnosti obavlja u novoizgrađenom tvorničkom kompleksu sa proizvodnim pogonima i skladištem repromaterijala i gotovih proizvoda. Iz skladišta u Čitluku vrši se prodaja proizvoda na način da kupci, prema ugovorenoj narudžbi, preuzimaju gotove proizvode.

Privredni subjekt Europet nema maloprodajnih objekata niti poslovnica. Sva proizvodnja je unaprijed planirana prema ugovorenim potrebama kupaca i prodana na principu veleprodaje iz skladišta u Čitluku.

Prema podacima iz Prijave tržišni udjeli privrednog subjekta Europet i glavnih konkurenata na tržištu proizvodnje pet ambalaže u Bosni i Hercegovini u 2007. godini su:

Tabela 1.

Redni broj	Naziv privrednog subjekta	Tržišni udjeli (%)
1.	Sarajevska pivara d.d. Sarajevo	25,0
2.	Omorika d.o.o. Doboj	12,5
3.	Božić Plastika d.o.o. Doboj	12,5
4.	Bosna Plast d.d. Bosanski Petrovac	12,5
5.	Europet d.o.o. Čitluk	11,0
6.	Energopet d.o.o. Bijeljina	10,0
	Ostali	16,5
	UKUPNO	100,0

Iz navedenog proizilazi da tržišni udio privrednog subjekta Europet na tržištu Bosne i Hercegovine iznosi oko 11%, a pošto privredni subjekt Alpla Holding na tržištu Bosne i Hercegovine nema tržišni udio neće doći do povećanja tržišnog udjela učesnika koncentracije na relevantnom tržištu.

7. Ocjena predmetne koncentracije

Konkurencijsko vijeće je, nakon procjene i analize podataka i utvrđenih činjenica u smislu člana 17. Zakona, u postupku donošenja predmetnog Rješenja, ocijenilo da provođenje predmetne koncentracije neće narušiti postojeću tržišnu konkurenciju s obzirom da privredni subjekt Alpla Holding nije prisutan na tržištu Bosne i Hercegovine te da predmetna koncentracija vodi samo promjeni vlasničke strukture između učesnika koncentracije iz čega proizilazi da navedena koncentracija neće proizvesti promjenu tržišnih pozicija na relevantnom tržištu.

Konkurencijsko vijeće je utvrdilo da se predmetnom koncentracijom privrednih subjekata ne stvara i ne jača dominantan položaj na relevantnom tržištu proizvodnje ambalaže iz plastičnih masa u Bosni i Hercegovini te je odlučilo kao u dispozitivu ovog Rješenja.

8. Administrativna taksa

Na ovo Rješenje podnosilac Prijave, u skladu s članom 2. tarifni broj 107. stav (1) tačka d) 1) Odluke o administrativnim taksama u vezi sa procesnim radnjama pred Konkurencijskim vijećem («Službeni glasnik BiH», broj 30/06), obavezan je platiti administrativnu taksu u iznosu od 2.500,00 KM u korist Budžeta institucija Bosne i Hercegovine.

9. Pouka o pravnom lijeku

Protiv ovog Rješenja nije dozvoljena žalba. Nezadovoljna strana može pokrenuti upravni spor pred Sudom Bosne i Hercegovine u roku od 30 dana od dana prijema ovog Rješenja odnosno od dana njegovog objavljivanja.

Predsjednik

Ibrica Lakišić